




Pranuar / Dorezuar Priljenoi/Prodato Received/Delivery	21.03.2022	2	vitit god. Year
Organ /Njesia Organ /Jednica Org /Unit	Nr Prot Br Prot Prot No	Shtojca Prilog Appendix	Sasia Kolicina Quantity
SKINSHICK	1469/2022		1/4



Republika e Kosovës

Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS NEZAVISNI NADZORNI ODBOR CIVILNE SLUŽBEKOSOVA INDEPENDENT OVERSIGHT BOARD FOR THE CIVIL SERVICE OF KOSOVO

A.nr.106/2022

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave në përbërje nga: Ardita Haxhnikaj-Demi-kryetare, Arben Mehmeti dhe Jeton Koca-anëtarë si dhe Ardita Perçuku-Shyti-Zyrtare e Lartë për Bashkëpunim Profesional në cilësinë e procesmbajtëses, ka shqyrtuar ankesën me numër A.nr.106/2022 të datës 10.02.2022 të parashtruar nga ankuesi Prishtinë, në çështjen juridike “kompensim material”, duke vepruar në pajtim me nenin 6 paragrafin 1 nën paragrafin 1.1 dhe nenin 18 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datën 21.03.2022, mori këtë:

V E N D I M

- I. Refuzohet si e pa bazuar ankesa me numër A.nr.106/2022 e datës 10.02.2022 e parashtruar nga ankuesi
- II. Mbetet në fuqi Vendimi DM 214/2022 i datës 20.01.2022 i Zëvendësuesit të Drejtorit Menaxhues të Agjencisë Kosovare të Privatizimit.

A r s y e t i m

Ankuesi nëpunës civil në Agjencinë Kosovare të Privatizimit (*tani e tutje referuar si AKP*), me datën 10.02.2022 ka parashtruar ankesën me numër të protokollit 651/2022 të regjistruar me numër A.nr.106/2022 në Këshillin e Pavarur Mbikëqyrës për Shërbimin Civil të Kosovës, kundër Vendimit DM 214/2022 të datës 20.01.2022 të Zëvendësuesit të Drejtorit Menaxhues të AKP-së, për shkak të shkeljeve thelbësore të dispozitave të Ligjit për Procedurën e Përgjithshme Administrative, konstatimit të gabuar dhe jo të plotë të gjendjes faktike dhe aplikimit të gabuar të se drejtës materiale.

Këshilli i Pavarur Mbikëqyrës për Shërbimin Civil të Kosovës, bazuar në Rregulloren Nr. 02/2018 për Procedurën e Shqyrtimit dhe Vendosjes së Ankesave, me datë 14.02.2022 ka kërkuar përgjigje në ankesën e ankuesit nga Drejtoria e Burimeve Njerëzore të AKP-së, ndërsa më datë 28.02.2022 ka pranuar përgjigjen se bashku me shkresat e bashkangjitura të lëndës.

Kolegji për Shqyrtimin dhe Vendosjen e Ankesave, ka administruar këto prova: Ankesën e ankuesit të datës 10.02.2022 e parashtruar në Këshillin e Pavarur Mbikëqyrës për Shërbimin Civil të Kosovës; Vendimin e datës 14.12.2021 me numër DM 214/2021 të Zëvendës Drejtorit Menaxhues; Kërkesën e ankuesit të datës 23.12.2021 lidhur me pagesën e kamatës për pagesën e 50% gjatë kohës së pezullimit parandalues si dhe pagesën e pushimeve vjetore nga viti 2014-2021; Vendimin e datës 20.01.2022 nga Zëvendës Drejtori Menaxhues; Kërkesën për përgjigje në ankesë të datës 14.02.2022 nga Këshilli i Pavarur Mbikëqyrës për Shërbimin Civil të Kosovës; Përgjigjen në ankesë me numër protokollit 1045 të datës 28.02.2022 nga Agjencia Kosovare e Privatizimit me shkresat e bashkangjitura të lëndës: Akt emërimit e ankuesit me numër reference 35/DL 9 të datës 18.08.2014; Përshkrimin e detyrave të punës së ankuesit; Vendimin e datës 19.09.2014 nga Menaxheri i Burimeve Njerëzore; Vendimin e datës 12.01.2015 nga Zyrtari kryesor administrativ; Kërkesën e ankuesit të datës 17.11.2021 për kthimin në vendin e punës; Aktvendimin e datës 15.11.2021 e Gjykatës Themelore në Prishtinë-Departamenti Special; E-mailin zyrtar të datës 28.02.2022; E-mailin zyrtar të datës 23.12.2021; E-mailin zyrtar të datës 28.02.2022; E-mailin zyrtar të datës 23.12.2021; Pasqyra me listën e të dhënave për detyrimet kontigjente për ankuesin për periudhën 19.09.2014-31.12.2019; Urdhër obligimit për pagesë të datës 09.12.2021 me numër të referencës 23921832; E-mailat zyrtar të datës 24.12.2021; Kërkesën e ankuesit të datës 23.12.2021.

Kolegji për Shqyrtimin dhe Vendosjen e Ankesave, ka shqyrtuar të gjitha shkresat e lëndës të parashtruara nga palët dhe ka vërtetuar se ankesa e ankuesit është e pa bazuar, sepse:

Bazuar në provat e lëndës, gjegjësisht Akt Emërimit me Numër Reference 35/DL 9 të datës 18.08.2014 është konstatuar se ankuesi ka qenë i punësuar në vendin e punës *Kryesues i njësisë për përfaqësim ligjor* në kuadër të Departamentit ligjor në Agjencinë Kosovare të Privatizimit.

Menaxherja e Burimeve Njerëzore në AKP, me datën 19.09.2014 përmes Vendimit me numër protokollit 7207 dhe numër reference 08/2014, ankuesit i ka shqiptuar masën e Pezullimit Parandalues me 50% të pagës, nga data 19.09.2014 deri në marrjen e vendimit përfundimtarë nga organet kompetente, me arsyetimin se ndaj të njëjtit janë duke u zhvilluar hetime penale. Ndërsa me Vendimin me numër ZDM 02/2015 të datës 09.01.2015 të U.d. Drejtorit Menaxhues të AKP-së, ankuesit i është vazhduar pezullimi parandalues i datës 19.09.2014.

Gjykata Themelore në Prishtinë/Departamenti Special, me datën 08.11.2021 ka nxjerr Aktvendimin me numër PKR.nr.130/16 me të cilin aktvendim ka pushuar procedurën penale ndaj ankuesit për shkak të parashkrimit të ndjekjes penale që shkakton përjashtimin e ndjekjes penale.

Kolegji për Shqyrtimin dhe Vendosjen e Ankesave, gjatë shqyrtimit të shkresave të lëndës ka gjetur se ankuesi me datë 17.11.2021 përmes shkresës me numër protokollit 4591 i është drejtuar Zëvendësuesit të Drejtorit Menaxhues, dhe Menaxherit të Burimeve Njerëzore të AKP-së me kërkesë për kthim në vendin e punës me të gjitha të drejtat dhe detyrimet nga marrëdhënia e punës.

Zëvendësuesi i Drejtorit Menaxhues të AKP-së, me datë 14.12.2021 ka nxjerrë Vendimin me numër DM 1242/2021 përmes të cilit ka shfuqizuar Vendimin me numër ZDM 02/2015 të datës 09.01.2015 për pezullim parandalues të ankuesit, dhe rrjedhimisht ankuesit sipas këtij vendimi nga data 15 dhjetor 2021 i është njohur e drejta e rikthimit në pozitën e mëparshme të vendit të punës Kryesues i Njësisë 9 të datës 18.08.2014, si dhe e drejta e realizimit të 50% të pagesë për periudhën kohore gjatë të cilës ankuesi nuk e kishte realizuar për shkak të pezullimit parandalues. Sipas provave të administruara, pas nxjerrjes së Vendimit me numër DM1242/2021 të datës 14.12.2021, ankuesit me datë 21.12.2021, përmes Urdhër Obligimit për Pagesë me numër të referencës 23921832 i është bërë



kompensimi i 50% të pagesë për periudhën kohore gjatë të cilës i njëjti nuk e kishte realizuar për shkak të pezullimit parandalues.

Ankuesi, me datë 23.12.2021, përmes kërkesës me shkrim drejtuar punëdhënësit ka kërkuar pagesën e kamatës ligjore për pagesën e 50% të pagës gjatë kohës së pezullimit parandalues dhe pagesën e pushimeve vjetore nga viti 2014-2021.

Zëvendësuesi i Drejtorit Menaxhues të AKP-së pas shqyrtimit të kërkesës së datës 23.12.2021, me datë 20.01.2022 ka nxjerr Vendimin me numër DM 214/2022 me të cilin ka refuzuar kërkesën e ankuesit në lidhje me pagesën e kamatës ligjore për pjesën e 50% të pagës gjatë periudhës së pezullimit si dhe kërkesën për pagesën e pushimit vjetor gjatë periudhës së pezullimit.

Kundër Vendimit me numër DM 214/2022 të datës 20.01.2022, ankuesi me datë 10.02.2022 parashtron ankesë në Këshillin e Pavarur Mbikëqyrës për Shërbimin Civil të Kosovës, për shkak të shkeljeve thelbësore të dispozitave të Ligjit për Procedurën e Përgjithshme Administrative, Konstatimit të gabuar dhe jo të plotë të gjendjes faktike dhe Aplikimit të gabuar të së drejtës materiale, me pretendimin ankimor për njohjen e të drejtës lidhur me pagesën e kamatës ligjore prej 8% për pjesën e 50% të pagës gjatë periudhës së pezullimit parandalues si dhe pagesën e pushimit vjetor për periudhën 2014-2021.

Kolegji për Shqyrtimin dhe Vendosjen e Ankesave, lidhur me shqyrtimin e ligjshmërisë së pretendimeve ankimore të ankuesit analizoje dispozitat e Ligjit Nr.03/L-149 për Shërbimin Civil të Republikës së Kosovës, përkatësisht nenin 69 ku përcaktohet se: *1. Nëpunësit civilë pezullohen, me pagesë 50% të rrogës së tij/saj, menjëherë nga detyra nga organi përgjegjës për menaxhimin e personelit të institucionit punëdhënës nëse: 1.1. kundër tij/saj është iniciuar procedurë penale për kryerje të veprës penale gjatë ushtrimit të funksioneve të tij/saj; 2. Në rast të pezullimit parandalues, nëpunësi civil do të marrë 50% të rrogës së tij/saj gjatë tërë kohëzgjatjes së pezullimit, deri në marrjen e vendimit përfundimtar nga gjykata. 3. Nëse nëpunësi përkatës civil më pas rikthehet në shërbim, qoftë për shkak se akuza kundër tij/saj nuk ka mundur të dëshmohet, për shkak të dyshimit ose arsyeve të tjera teknike, ai/ajo duhet të konsiderohet se është pezulluar nga ushtrimi i detyrës. Periudha e mungesës do të trajtohet si periudhë e qëndrimit në detyrë për të gjitha qëllimet dhe nëpunësit civil duhet të marrë rrogën e plotë dhe mëditjet të cilat ai/ajo do t'i kishte marrë nëse nuk do të ishte pezulluar nga shërbimi, dhe rrjedhimisht konstatoi se pretendimi ankimor lidhur me pagesën e kamatës ligjore prej 8% për pjesën e 50% të pagës gjatë periudhës së pezullimit parandalues nuk është i bazuar sepse çështja e pezullimit parandalues për nëpunësit civil ka qenë e rregulluar në mënyrë specifike me dispozitat e nenit 69 të Ligjit Nr.03/L-149 për Shërbimin Civil, dhe se organi i punësimit pezullimin e ankuesit e ka bërë në mbështetje të këtyre dispozitave ligjore. Organi i punësimit pas pushimit të shkaqeve të cilat kanë sjellë pezullimin parandalues, ka ndërmarr të gjitha veprimet ligjore dhe ka shfuqizuar vendimin për pezullim parandalues të ankuesit, duke e kthyer të njëjtin në vendin e tij të punës dhe ankuesit i ka kompensuar edhe humbjet në pagë, gjegjësisht 50% të pagës të cilën ankuesi nuk e kishte realizuar gjatë periudhës së pezullimit parandalues, ashtu siç përcaktohet me nenin 69 paragrafi 3 të Ligjit Nr.03/L-149 për Shërbimin Civil.*

Kolegji për Shqyrtimin dhe Vendosjen e Ankesave, po ashtu shqyrtoj edhe pretendimin ankimor të ankuesit për kompensimin e pushimeve të pashfrytëzuara për periudhën kohore 2014-2021, periudhë kjo kur ankuesi ishte i pezulluar nga puna dhe rrjedhimisht konstatoi se pretendimi ankimor i ankuesit nuk është i bazuar sepse çështja e pushimit vjetor është e rregulluar me dispozitat e nenit 39 të Ligjit Nr.03/L-149 për Shërbimin Civil të Republikës së Kosovës, ku me paragrafin 2 të këtij neni përcaktohet se: *Gjatë çdo viti kalendarik, nëpunësi civil ka të drejtë në pushim*



vjetor me pagesë me kohëzgjatje minimale prej tetëmbëdhjetë (18) ditë pune, në shkallën prej një ditë e gjysmë (1.5) për çdo muaj kalendarik të punësimit, andaj meqenëse ankuesi gjatë periudhës së pezullimit nuk ka qenë duke ushtruar detyrat dhe përgjegjësitë e punës, Kolegji vlerëson se i njëjti nuk ka mundur të fitoj, gjegjësisht akumulojë pushimin vjetor ashtu siç pretendon i njëjti. Për më tepër, duke iu referuar nenit 39 paragrafi 7 të Ligjit Nr.03/L-149 për Shërbimin Civil, Kolegji konstatoi se pushimi vjetor nuk mund të shndërrohet në formë tjetër kompensimi monetar ose jo monetar. Përjashtimisht, pushimi vjetor mund t'i kompensohet nëpunësit civil në rastet e ndërprerjes së marrëdhënies së punës në Shërbimin Civil, siç parashihet me dispozitat e nenit 5 paragrafit 8 të Rregullores Nr.06/2011 për Pushimet e Nëpunësve Civil, mirëpo në rastin konkret kemi të bëjmë me pezullim të përkohshëm nga marrëdhënia e punës, dhe jo me ndërprerje të marrëdhënies së punës, kështu që nuk janë plotësuar kushtet ligjore për kompensimin e pushimit vjetor edhe nëse ankuesi do të kishte pushim vjetor të pashfrytëzuar.

Andaj, bazuar si me lartë Kolegji vlerëson se Zëvendësuesi i Drejtorit Menaxhues të AKP-së me rastin e nxjerrjes së Vendimit me numër DM 214/2022 të datës 20.01.2022 me të cilin ka refuzuar kërkesën e ankuesit në lidhje me pagesën e kamatës ligjore për pjesën e 50% të pagës gjatë periudhës së pezullimit si dhe kërkesën për pagesën e pushimit vjetor gjatë periudhës së pezullimit, ka vërtetuar drejt gjendjen faktike dhe ka zbatuar drejt ligjin material, duke vepruar kështu në pajtim me dispozitat e Ligjit Nr.03/L-149 për Shërbimin Civil të Republikës së Kosovës, dhe dispozitat e Ligjit Nr.05/L-031 për Procedurën e Përgjithshme Administrative.

Kështu që pas analizimit dhe vlerësimit të të gjitha shkresave të lëndës si dhe duke u bazuar në nenin 18 paragrafin 1 nën paragrafin 1.1 të Ligjit Nr.06/L-048 për Këshillin e Pavarur Mbiqyrës për Shërbimin Civil të Kosovës, Kolegji vendosi si në dispozitiv të këtij Vendimi.


Vendimi hyn në fuqi ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.


KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.106/2022

Ardita Perçuku-Shyti


Procesmbajtëse

Ardita Haxhnikaj-Demi


Kryetare e Kolegjit

Vendimi i dërgohet

- Ankuesit
- Zëvendës Drejtorit Menaxhues të Agjencisë Kosovare të Privatizimit;
- Menaxheres së Personelit në Agjencinë Kosovare të Privatizimit dhe
- Arkivit të KPMSHCK-së.

